

**Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqqullugu.**

*(Inatsisartunut ilaasortaq Anthon Frederiksen, Partii Naleraq)*

## **Siunnersuutip aappassaaneerpeqarneranut**

### **Sanaartornermut ataatsimiititaliap**

#### **ISUMALIUTISSIISUTAA**

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, Siulittaasoq  
Inatsisartunut ilaasortaq Kalistat Lund, Inuit Ataqtigiit, Siulittaasup tullia  
Inatsisartunut ilaasortaq Jens-Erik Kirkegaard, Siumut  
Inatsisartunut ilaasortaq Ane Hansen, Inuit Ataqtigiit  
Inatsisartunut ilaasortaq Justus Hansen, Demokraatit

UPA 2016-ip nalaani ull. 4. maj 2016 siullermeerereermermi Ataatsimiititaliap siunnersuut misissorpaa.

#### **Siunnersuutip imaa siunertaalu**

Siunnersuuteqartup siunertaraa, nunami innuttaasut akornanni immikkullu innuttaasut sulisut akornanni nuttarneq pillugu siuarsaanissaq. Nuttarnerup pitsaanermik pilernissaani tunngaviliunneqarpoq, innuttaasut sulinerminnut atasumik iniminnut pituttugaannginnissaat, inigisalli taassuma initut nalinginnaasumik attartortakkatut atuutlernissaa.

#### **Siunnersuutip Inatsisartuni siullermeerneqarnera**

Partiit akornanni nalinginnaasumik isumaqatiginartinneqarpoq, innuttaasut ininik pitsaanernik akikinnernillu periarfissaqarnissaasa isumannaarunnissaat, inigisarmi pigiinnarsinnaajumallugu suleqataasut kikkulluunniit suliffimmi kajungerinngisaminni ingerlaannarnissartik soqutigisarigunangilaat. Naalakkersuisut siunnersuutigaat, siunnersuut Inissianik attartortitsisarneq pillugu peqqussutip ataatsimut aaqqissuuteqqinniarnanumut ilanngunniarneqassasoq, taamaalilluni

immikkoortoq una tunngavigalugu immikkut allannguutissatut siunnersuummik qinnuteqartoqartariaqassanngimmat.

### **Saaffiginnissutit**

Ull. 18. april Ataatsimiititaliap A/S Inissiaatileqatigiiffik INI ataatsimeeqatigaa. Ataatsimiinnermi Ataatsimiititaliap piumasaqarneratigut pisumi A/S Inissiaatileqatigiiffik INI siunnersuummut saqqummiunneqartumut isummaminik ilisimatitsivoq.

### **Ataatsimiititaliap siunnersuummik suliaqarnera**

Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi isumaliutissiissut Ataatsimiititaliap misissuinerminut atatillugu nassaarisimava. Tassani ima allassimasoqarpoq:

”Allannguutit ilaat Inatsisartut Attaveqarnermut Ineqarnermullu Ataatsimiititaliaannit maluginiarneqartoq tassaavoq sulisunut inissiat ukiut arfineq marluk najugarineqareernerisigut inissiatut nalinginnaasumik attartukkatut tigupeqarsinnaalernissaat. Tamatuma saniatigut soraarninngortut sulisunut inissiami ukiut pingasut najugaqarsimagunik soraarninngornermini taassuma tiguinissaanut periarfissinneqarnerat pissusissamisoortutut ataatsimiititaliamit isigineqarpoq. Iliuutsit taaneqartut ineqarneq suliffeqarnerlu eqqarsaatigalugit nikerarsinnaassuseqarnermut annertusaataaqataallutillu suliffeqareernerup kingorna soraarninngortut amerlanerit nunatsinniiginnarnissaannut periarfissiipput.”

Oqallinnermi tunngavilersuutitut saqqummiunneqartut tunngavigalugit aamma pineqartoq pillugu ataatsimut isigalugu naliliineq tunngavigalugu Ataatsimiititaliap nalilerpaa, sulisunut inissiani ineqartut tamarmik naligiissinneqarnissaat tulluartsuussasoq, taamaalilluni sulisunut soraarnerussutisiaqalernissaminnut atatillugu immikkut pisinnaatitaaffeqartoqassanngilaq, tamannami maanna Inissianik attartortitsisarneq pillugu Inatsisartut peqqussutaanni § 21, imm. 3-mi atuummat.

Taamaattumik Sanaartornermut ataatsimiititaliaq nutaamik siunnersuuteqarpoq, tamannalu tunngavigalugu ukiuni arfineq marlunni imal. ukiuni tallimani suliffimmut atasumik inimi ineqartariaqarani, ukiulli pingasuinnaat qaangiunneranni suliffimmut atatillugu inigisaq nammineq nalinginnaasumik attartukkatut aqqissuunneqarsinnaalissalluni.

### **Siunnersuutip aningaasatigut kingunissai**

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq.

Ataatsimiititaliap paasivaa, tamanna tunngavigalugu siunnersuutip piviusunngornerani aningaasatigut kingunissai taaneqarsimasut, taamaalillutik allaffissornikkut aningaasatigullu siunnersuutip kingunissai tassaalissallutik AC tunngavigalugu sulisitap akissarsiaasa 1/12-ii, taakkulu maanna aningaasatigut killiliussaareersunit tiguneqarsinnaassasut.

Aamma siunnersuuteqartoq ima saqqummiussivoq: “Ukiut arfineq marluk atuuttussanngortinneqarnerannut atatillugu taamanikkut naalakkersuisut oqaatingaat, siunnersuut aningaasaqarnikkut, allaffissornikkullu, innuttaasunut, pisortanut namminesortunullu sunniuteqarnerlussanngitsoq.”

Naalakkersuisut allatut naliliinikuunngillat, malitsigisaanillu Sanaartornermut ataatsimiititaliaq taamaaliorusunngilaq.

### **Ataatsimiititaliap inassutai**

**Ataatsimiititaliap isumaqatigiittup** taamaalilluni allannguutissatut siunnersuut imaattoq saqqummiutissavaa:

Attartortut ukiuni kingullerni pingasuni suliffimmut atatillugu inigisami ineqarsimasut inip taassuma nalinginnaasumik attartortittakkatut tiginissaanut pisinnaatitaalersillugit Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup allanngortinnissaanut UPA 2017-imut siunnersuummik Naalakkersuisut saqqummiusseqqunissaannik Inatsisartut aalajangiiffigisassaattut siunnersuut.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.

---

Anders Olsen, Siulittaasoq

---

Kalistat Lund,  
Siulittaasup tullia

---

Jens-Erik Kirkegaard

13. maj 2016

UPA 2016/069

---

Justus Hansen

---

Ane Hansen